

Inatsisartut suleriaasianni § 33 naapertorlugu matumuuna Inatsisartut aalajangiiffigisassaattut siunnersuut imaattoq saqqummiuppara:

Qamutinuut motoorilinnut akitsuutitigut isertitat konto 24.11.11-mi naatsorsuutit kingulliit aallaavigalugit isertitaasut affaasa sinerissami aqqusinigissaanernut aqqusinniornernullu atugassanngorlugit immikkoortinneqartalernissaat sulissutigeqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaqaq Anders Olsen, Siumut)

Tunnngavilersuut:

Nunatsinni kommuunit sinerissami illoqarfinni nunaqarfinnilu aqqusinniornerit aqqusinigissaanerillu isumagisaraat aningaasartuutugalugillu. Tunnngaviusumillu tamanna aamma taamaattussaasutut isigisariaqarpoq.

Ukiunili kingullerni malunnaatilimmik sinerissami illoqarfinni nunaqarfinnilu amerlasuuni aqquserngit annertuumik aserfallassimapput aserfallakkiartuinnarlutillu, ilaatigullu kommuninut annertuumik aningaasartuutaasarlutik.

Isumaqarpunga nunarput tamaat eqqarsaatigalugu avaqqunneqarsinnaajunnaartoq Nunatta Karsia illoqarfiit nunaqarfiillu aqqusiniinut aserfallassimaqisunut iluarsaannissaannut aningaasatigut ikiorsiissuteqartariaqarneranut, naak Nunatta Karsia kommuninut ataatsimut tapiissutit aqqutigalugit ukiut tamaasa aningaasaliisaraluartoq.

Aqqusinertigullu aserfallannerit ilaatigut ima annertutigaat kommunit namminneq suliassaq tamakkiisumik kisimiillutik kivissinnaanagu, ukiunilumi makkunani kommunit aningaasatigut inissisimanerat suli ilaatigut ilungersunartumiinnerat aamma eqqaamasariaqarmat.

Ukiunilumi kingullerni aamma annertuumik tusarsaalernikuuvoq ilaatigut namminersorlutik inuussutissarsiuteqartut, taxatillit allarpasuillu aqqusinertigut atugassarititaasut ajorpallaarujussuarnerannut malaaruteqartartut. Piffimmi ilaanni aqquserngit ajorpallaarujussuarnerisa kingunerisaannik inuussutissarsiutimik, taxatimik allatigulluunniit qamutaatimik sukkasuumik aserulertornerusarnerat piffinni aqqusinigissaartuninngarnit oqariartuutigineqartarpoq, naak assigiimmik akitsuutitigut akiliuteqartaraluartik. Tamannalu allannngortittariaqartoq isumaqarpunga.

Sinerissami aqqusinertigut pitsanngorsaanissat pisariaqarluinnalernerannut aamma tunnngaviulluinnartut ilagaat nunaqarfinni assersuutugalugu eqqagassalerinerup tunngaatigut

ajornartorsiuteqarnerup millisaavigineqarnissaa aqutissiuunneqartariaqarmat, tassami eqqagassalerineq pillugu oqallittarnerni aamma ajornartorsiutitut annertuutut isigineqartarmat nunaqarfinni aqquuserngit pitsaannginnerujussuisa kingunerisaanik eqqagassat pitsaasumik isumannaatsumillu suliarineqartarsinnaannginnerannut.

Naggataatigullu taamatut aqqusinigissaanissat aqutissiuunniarneqarnerat soorunami aamma isumannaallisaanerunissamik siunertaqarmata erseqqissarusunnarpoq, tassami qularnanngitsumik aqqusinertigut pitsaassutsit appasinnerugaangata aqqusinertigut angallannerit ajutoortoqarnissaannut qaninnerusarput, tamannalu illua tungaanut saatinneqartariaqarpoq.

Meeqqat, utoqqaat innarluutilillu aqqusinernik annertuumik atuisuupput, taakkualu isumannaannerusumik avatangiiseqartinneqarnissaat soorunami aamma tamatta soqutigisariaqarparput.

Siunnersuutip pisortanut allaffissornikkut aningaasaqarnikkullu kinguneqaatissai

Ukiuni aningaasaliiffiusumi 2015-imi ukiunilu missingersuusiorfinni konto pingaarnermi 24.11.11-mi ukiumut 75,2 mio. kr-it aningaasaliissutigineqarput, taakkulu affaasa missaat 37,2 mio. kr-iupput. Aningaasallu taakku manna tikillugu aningaasanut inatsit pillugu isumaqatiginninniarnerne allanut atugassiissutigineqartarpoq, tamatumalu kinguneranik ISA-mik angusap ajorseriaateqannginnissaa anguniarlugu konto pingaarnerni allani ileqqaaruteqarlunilu pingaarnersiueqqittoqartariaqarpoq.

Naalakkersuisut Inatsisartulluunniit ileqqaaruteqarnissaaq allaanerusumilluunniit pingaarnersiueq akuererusunnaguluunniit innersuussissanngippata, taava ISA-mik angusaq ukiuni aqqusinernik iluarsartuussiffiusuni 37,2 mio. kr-inik ajorseriaateqassaaq.

Siunnersuutip namminersortunut allaffissornikkut aningaasatigullu kinguneqaatissai Soqanngilaq.

Siunnersuutip innuttaasunut allaffissornikkut aningaasatigullu kinguneqaatissai

Siunnersuutip piviusunngortinnera innuttaasunut pitsaasunik pitsaanngitsunillu kinguneqaateqassaaq. Iluarsartuussinissamut aningaasaliisoqassappat, ISA-mik angusaq ajornerulersinneqassanngippat, aningaasat taakku konto pingaarnernit suliniutinilluunniit allanit aaneqartariaqassapput. Allaanerusumik pingaarnersiuisoqarnanilu ileqqaaruteqartoqanngippat, innuttaasut siunissami qaninnerusumi kinguneqaatissanik sunnerneqassanngillat. Piffissalli ingerlanerani ISA-mik angusap ajorseriarnera ilutigalugu kinguneqaatit annertusiartussapput.